

Aen ranz cang ndei lo, ronghsagsag. Ndaw sim mehyah gizcangj cungj roxnyinh miz aen nwnj ndeu, gwnz ciengz nem bakdou haenx miz aen congh lumj gaemxgienz hung nei, lumj ndaw dang byaek ndawde miz ceh haenx nou ndeu, hawj de gig mbouj cwxcaih. Gij cienz cawx dauq ranz neix dauqdaej cungj dwg de boux dog gag bae banhleix daigvanj. Aen congh neix dwg gizcangj daengq gunghyinz itdingh aeu vat, gizcangj naeuz aen congh haenx dwg hai diuz loh hawj duzmeuz haeuj ranz daeuj gaeb duznou. Aen congh doeklaeng cang ndaej raeuzlili, sanq ok gij ronghgywg saek ngaenz, yienghneix mehyah gizcangj hix mbouj caiq gangj maz lo.

Gyoengqvunz naeuz gizcangj dwg boux hak seuq, buen ranz seiz lienz aen gyahgi baenziengh cungj mbouj miz saek aen. Caiqnaeuz gyahgi lij baenzneix gaeuj.

Mehyah gizcangj miz ngoenz ndeu doiq gizcangj naeuz: “Raeuz cawx aen denbinghsiengh moq ndeu ba!” Gizcangj dap naeuz: “Aen gaeuj lij yungh ndaej, ngaenz ndaej mbaet di couh mbaet ba!” Meh yah gizcangj couh haibak ndaq hwnjdaej: “Mwngz yawj mwngz dang ndaek gizcangj neix, haeuj ranz moq mbouj gangj mbouj miz saek aen gyahgi baenziengh, lienz aen ranz gou buet bae buet dauq ra ngaenz cawx mwngz gawqyienz hai aen congh ndeu, mwngz caeuj vunz caen mbouj doxdoengz lo!” Gizcangj muengz goemq bak mehyah hwnjdaej naeuz: “Mwngz sing daemq di ndaej lwi? Hawj bouxwnq dingqnyi mbouj ndei!”

Saedcej couh baenzneix gvaqbae lo. Gojnwngz gizcangj roxnyinh doiq mbouj hwnj mehyah, moix baez banngoenz roengzban cungj beij mehyah ma ndaej caeux, mehyah gizcangj dauq ranz baez hai dou, couh ndaej naengh youq henz daiz gwn ngaiz ndat byaek raeuj. Meh yah gizcangj riu naeuz: “Riengz mwngz baenzlai bi, couh dan gienh saeh neix mwngz guh ndaej haemq ndei.” Gizcangj naeuz: “Cijaeu mehyah

• cienlanz sawcuenb •

Aen Congh Ndawsim



□ Siz Bungzcwngz / 石鹏程

muenxeiq, baezlaeng gou ngoenz-ngoenz roengzban liux couh dauq ranz cawj haeux guh byaek deq mwngz.” Meh yah gizcangj ngauz gyauej naeuz: “Mbouj yungh baenzneix, geiqndaej dauq ranz caeuj gou gwn haeux couh ndaej lo!” “W! Ndei!” Gizcangj riunyumnyum dwk dapwngq lo.

Mehyah mbouj youq ranz, gizcangj naengh youq gwnz sah faz, da hix mbouj laep dwk cim yawj aen congh gwnz ciengz, lumj yaek miz duznou ndonj haeujdaej, de couh aeu dwg gingj cangj meuzndaem gaemh duznou lo. Duznou mbouj daeuj, hoeng bakdou “dung dung dung” yiengj lo. Gizcangj hwnqndang, mbouj bae haidou, cij dwg byaij daengz naj aen congh. Yaep he, aen byuksaenq ndeu daj aen congh ndienq gvaqdaej, gizcangj dawz ndei, byaij haeuj ndaw rug bae.

Mehyah gizcangj ma ranz, gizcangj naeuz: “Ngaiz caeuj byaek gou cawj ndaej lo, mwngz gwn gonq, gou lij miz di saeh bae guh. “Mwngz vaiq bae vaiq ma.” Meh yah gizcangj naeuz. Gizcangj geb aen daehgungh-vwnz saek ndaem byaij roengz laeuz bae lo.

Gizcangj hauilai nanz mbouj caeuj mehyah caez gwn ngaiz lo, mehyah baenznaengz ma ranz, gizcangj couh geb daehgunghvwnz saek ndaem okbae. Meh yah gizcangj hix mbouj miz maz yigen, ndawsim ngeix: Bouxwnq gyanghaemh cungj mbouj ma ranz, hoeng de dwg banngoenz okbae, ndaej miz maz vwndiz ha? Gij saeh

bouxgvan itdingh lai, de roengzban sien cawj haeux ndei hawj gou, caiq bae guh saeh, doiq gou caen dwg ndei.

Ngoenz ndeu, mehyah gizcangj baez haeuj ranz couh swenj: “Ngoenzneix gou iek yaek dai lo, ngaiz caeuj byaek cawj ndaej caengz?” Mbouj miz vunz han, de haeuj bakcauq baez yawj, aen rek aen cauq cungj gyoetgyat, hai binghsiengh, byaek hix caengz cawx. Meh yah gizcangj gag gangj gag naeuz: “Ndaek gizcangj neix ha, hainduj baij gyaq lo, baezlaeng lijdwg gou gag doenghfwngz cij miz gwn.”

Gyanghaemh, gizcangj lij caengz ma ranz, mehyah gizcangj miz di gip lo. De sikhaek daj soujgih gizcangj, mbouj miz vunz ciep. Dauqdaej bae guh maz? Gaxgonq mehyah gizcangj lij miz di hozhwnj, yiet deq yiet yousim.

Mehyah gizcangj nyap dwk byaij bae byaij dauq, yawj yawj ndaw ranz seiqhenz, da de cim yawj aen congh gwnz ciengz. Aen congh neix mbouj rox seizlawz gaenj bienq ndaej baenzneix wenj, hoeng mbouj raen saek diuz bwn meuz.

Mehyah gizcangj baez hai densi, miz diuz sinhvwnz ndeu camx haeuj rwz de: Bonjsi moux giz gizcangj aenvih dam cienz gwn oet deng songgvi. De gyad naengh youq gwnz sah faz, siengj: Baenzlawz gojnwngz ne? Ndaek gizcangj ranz gou mbouj dam faen ngaenz dauq ranz gvaq a, dwg boux hak seuq ha! Gyoengqde itdingh guh loek lo!

Mehyah gizcangj gip dwk bae

gungh’ anhgiz, raen boux gingjcaz couh naeuz swheij dwg mehyah moux gizcangj, de ndaej guhcingq, bouxgvan de itdingh dwg boux hak seuq! Ranz de dwg daigvanj daeuj cawx, mbouj miz maz cienz.

Doeklaeng mehyah gizcangj raen daengz gizcangj, gizcangj mbouj gangj saek coenz vah, lwgda muengh ok rog cueng ngaenzgwdngwd.

Mehyah gizcangj naeuz: “Mwngz aeu yiengq cujcaz gangj cingcuj ha!” Gizcangj lijdwg mbouj ok sing.

“Mwngz mbouj gangj, gou bae gangj!” Meh yah gizcangj sing hung dwk swenj hwnjdaej.

Gizcangj cij menh naeuz: “Gou guh saeh loek lo.”

Mehyah gizcangj cam: “Guh maz?”

Gizcangj naeuz: “Ranz raeuz mbouj miz duznou, hoeng, cijaeu miz aen congh haenx, miz ngoenz ndeu cungj miz duzmeuz haeujdaej gaemh.” Meh yah gizcangj baenzlawz cungj mbouj mingz beg.

Gizcangj gejnaeuz: “Cienz, cungj cuengq youq laj mbonq, cungj mbouj caengz yungh saek faen, mwngz baema dawz bae gyau hawj guekgya, gemjmbaeu gij coih gou.”

Mehyah gizcangj danq naeuz: “Mwngz caen uk huk ha! Gvaiq gou gaxgonq mbouj wnggai doengzeiq hawj mwngz guh aen congh haenx ha!”

Gizcangj naeuz: “Mbouj gvaiq mwngz, dwg ndaw sim gou miz aen congh ndeu.”

Gou Gyaez Naedraiz

我爱露珠

□ Vangz Fungmingz / 黄凤明

Moix bi daengz seizhah, gou maij hwnq romh byaij bae gwnz ndoi youz. Miz ngoenz ndeu, ronghndwen lij youq gwnz mbwn, lumj aen ngaue nei, miz saek aen ndaundeiq ronghyeb, go faexliux caeuj gomiuz gangjsebseb, rumz iq ci daeuj, sangjsag baenzmaz.

Yaep ndeu daengngoenz hai aen naj de okdaej le, ndit dak aen seiqgyaiq ndongqradrad. Yawj gwnz mbawfaex miz gyoengq naedraiz iqetet, iengj gij sag-rongh daengngoenz! Lumj ndau-ndeiq gyangmbwn, lumj naed rincawbauj, ndeigyaez dangqmaz!

Naedraiz mingh dinjdetdet, hoeng de mbouj bingzciengz. Seiz yaek laep, de lumj daxmeh cij lwgnyez nei rwed gomiuz; seiz yaek rongh, de youh boux daih’ it hai aen lwgda mbouj rox baeg haenx, ganjvaiq ndoj haeuj ndaw hoengheiq bae, hawj hoengheiq nyinh dumz. De laeglemx guh hong mbouj gangj saek coenz vah, dawz mingh dinjdet de baen hawj gomiuz, caemhcai mbouj gouz gomiuz hawj de maz.

Gou maij naedraiz, youq ndaw sim gou, de beij lwgcau lij bengz, beij naed rincawbauj lij rongh, beij ndaundeiq lij lwenq.



Gyoengq dahsau genj makgamgaet.